

## Prétchemint do londi d' Walonîye 2016

Mès djins, dji m' dimande todi dovint qui l' Comité Central di Wallonîye m'a prîyî po l' mèsse è walon.

Bin sûr, on bia djoû, dj'a r'cî one bèle lète do Président mossieû Willemart. Mins djè lî a bin rade rèspondu : 'Èstoz bin sûr ! Si vos n'è l' savoz nin, dji vos l'aprend, vos l' dimandoz à on mitan d' Flamind, savoz ! Èt l' mèyeû d' tot, à on N.V.A. Nin li NVA da Bart De Wever ! Nonna ! One NVA bin d'amon nos-ôtes... N po Namurwès... qu'i m' chone-t-i nos l'èstans quausu tortos, parèt !

V po vayant... Vayant, Vayant, come tos lès Namurwès, là !

Èt A po Arsouye !

I m'a rademint rèspondu : 'Si c'è-st-insi d'abôrd, vos p'loz v 'nu !

Èt dj'a v 'nu !

Li côp passé, Pol nos-a causé d' Jan Fabre, èt di s' tortûwe qu'on-z-a mètu véla au d'zeû do Grognon. Mès djins, one tortûwe, à Nameûr ! On-z-aurè tot vèyu, don !

Noste èvêque, qu'èst véci pad'avant mi, m'a d'mandé di baguer à Mautche. Èt dins mès bagadjes, dj'a r'trové on tauvia, qu'i-gn-a saquants-ans di d'ci, on-ârtisse aveûve fait po lès scouts di Bomel. Djè l'a amwinrné avou mi !

Deûs caracoles ! N'èst-ç' nin bia ! Deûs bèlès biesses qu'ont stî, tote li djoûrnéye, su leû pwèd, tot paujêremint ; fiant one taudje véci, one véla, come on-z-è pout fé lès djoûs d' Walonîye. Qu'au mitan - nin au coron - qu'au mitan dèl djoûrnéye, èle sont si télemint naujiyès qu'èle si r'pwasenut... C'èst co bin nos-ôtes, don, ça !

Adon, Mayeûr, dji n' sé nin si v's-avoz d'dja trové lès caurs po-z-acheter ci fameûse tortûwe-la ! Mins, s'il èst co timps, dji d'manderêuve – poqwè nin à Jan Fabre ? – di nos r'présinter one bèle, grosse caracole. One come nos lès vèyans voltî èmon nos-ôtes. Lès Namurwès sèront binaujes ! Vos savoz bin : « Dji di, mins dji n' di rin ! » Ci n'èst qu'one idéye, parèt !

On londi d' Walonîye, dj'èsteûve dins l'èglîje véci, à costé d' Pierre Dahin. Èt dj'a co l' sovance d'one ratournûre di nosse soçon Pol : 'Quand dji vwè, ç' qui dj' vwè, quand dj'ètind çu qu' dj'ètind, mès djins, dji n' so pus sbaré d' pinser ç' qui dj' pinse'. ... Èt ça m'a fait sondjî al fauve – al parabole s'apinse qu'on dit è francès – qui Jésus nos raconte.

Quand dji vwè, totes cès djins-là, cès djon.nes-là, cès-èfants-là qui pètenut èvôye di leû payi po v'nu è l'Europe trover one miète di paîs èt d'amichtauvé ! Dji sondje à l'ome, lèyî à mitan mwârt su l' bwârd dèl' vôle...

Quand dji vwè tos lès cis et totes lès cènes qui, audjoûrdu, sont st-èmacralés dins leûs misères èt dins leûs pwin.nes. Èt nos-è conichans tortos dèl cis qui n'ont nin aujîy, qui pièdenut l'espwêr dèl bias djoûs ou qui sont lèyîs là su l'costé : dèl djon.nes ou dèl pus vîs qui sayenut d' trover d' l'ovradje (èt avou Caterpillar èt totes lès soces qu'ont clô, ça sèrè co mwins aujîy), dèl djon.nes ou dèl pus vîs qui nosse boune soce ni vout nin r'conèche, zèls qu'ont dèl bias diplomes. Dèl-ôtes qui

sayenut d' viker one miète di bouneûr et qui veûyenut l' dossêye tchaîr su leûs spales pace qu'i-gn-a toti bin dès lin.wes d'aspic po maû causer d' zèls. Dès-omes, dès feumes qu'on r'waîte di truviè pace qu'i n'ont pont yeû d' chance dins l'vîye. Oyi ! Ça m' fait co sondjî à ç't-ome la.

Mins, i-gn-a branmint dès bons Samaritins èto, savoz ! Dès djins, come i-gn-a véci à Nameur, qui n'ont nin peû d' prinde su leû timps èt qui boutenut po fé viker 'Li p'tite bouwéye', 'Lès Sauvèrdias', 'Li Resto do keûr', èt branmint d's-ôtès soces qu'apwatenut one miète di solia dins l' nwareû dès djoûs.

Yèsse one saquî qui rècoradje èt rastampe li cia qu'èst ployî pa l'pwèd d'one vîye bin pèsante à pwârter. Dji n' dwè nin aler pus lon. Vos vèyoze bin ç' qui dj' vou dîre, dwaî !

Oyi, mès djins, bin trop sovint, ça sint l' rèssèré. I nos faut douviè lès-uchs, lès finièsses, douviè nos-orèyes, nos-ouys, nos mwins ; mins pad'zeû tot, come li Bon Samaritin, douviè nos keûrs.

Dj'a quausu tot fait. Maîs po fini, dj'a sondjî à one fauve sicrîte pa André Henin, i-gn-a fwârt longtimps, su ç' parabole ci. Èt insi, dji rind bon d'wêr à one saqui qu'a v 'nu véci èto dîre mèsse è walon èt qu'a stî on maîsse po Paul, po André, por mi, èt po branmint. Dj'a candjî saquants noms po qui l' fauve si rapwate à nosse fièsse.

Gn-aveûve on côp, on-ome qui distchindeûve à vélo di Lôyi po v'nu aus fièsses di Waloniye ! Èt pace qui c'èsteûve li dicauce, i l' fait one miète pus longue. Vos savoz bin, don : on p'tit vèrè pâr ci, on p'tit vèrè pâr là, èt chake si toûrnéye. Vola qu'aus p'titès-eûres, noste ome aveûve ramassé s' chique (Ni riyoz nin dès maus tchaussis, i-gn-a dès savates po tortos ! Èt l' cia qui n'a jamais yeû l' fârce, qu'i m' tape li prumêre pîre !) Mais vos savoz bin, lès sôlèyes, parèt : « Sîya, djè rîrè bin tot seû ! » Vo-l-la qui r'broke su s' vélo, èt pèdaler è mèsurant l' vôle... li pus laudje possibe, co bin ! Mins quand il arive au laîd toûrnant, véla à Bossimé - vos vèyoze l'afaîre di d'ci - bardaf, noste ome au fossé !

Gn-a on bon Diè po lès sôlèyes, di-st-on. On-ôte aureûve stî touwé. Li, rin d' cassé... I saye bin di s' rilèver, mins, avou l'avance qu'il aveûve,... I r'tchaît èt i s'èdwâme.

A sèt' eûres au matin, li curé d' Loyî passe en auto – il aleûve dîre mèsse al catèdrale al place di l'èvêque qu'èsteûve en vacances... (c'èst toti lès minmes qu'ont bon ! Vos l' savoz bin !) Il avise noste ome. I l' ric'noche : « Vo-l-la co, ç'ti-là. Por mi, il a co ramassé s' chique do l'nét. Qu'i tire si plan ! Mi, dji n'a nin l' timps ! » Èt aye èvôle !

Arive on cinsî qu'aleûve à pature veûy si sès bièsses sont prèsses po l' martchî à Cîné : « Gn-a rin avou ça, di-st-i en-z-avisant l' maleureûs. Pont d'afaîres, pont d'misères ! Mi dji n'a rin vèyu !" Èt i passe yute.

I 'nn'arive on trwèziyn.me. On-ome nin d'avaurci, savoz ! On Flamind, parèt, qui voyadjeûve po l' Boûrènbond. Do côp qu'i veut l' tauvia, il arète si-t-auto. I dischind, I vint veûy di d'pus près. I cheût one miète l'ome qui d'warmeut, li. I lî r'nètîye si visadje avou s' prôpe mokwè. I l' rimèt su pîds èt l' mwin.ne à l'ôtel. Véla, i done cints-eûros au patron. « Tènoz di-st-i (en flamind, bin sûr ! ) purdoz sogne di li èt fioz v'nu on médecin. S'i gn-a nin po fé avou ça, dji payerè l' rèstant quand dji r'vérè l' samwin.ne qui vint.

D'après vos-ôtes, di-st-i nosse Sègneûr, liquék dès trwès a div'nu l' soçon d' l'ome qu'èsteûve coûtchî au fossé ?

Gn-a rin d' malauji à rèsponde à ça, don : « C'èst bin sûr li ci qu'a pris sogne di li ! »

- Aléz d'abôrd, di-st-l Jésus. Qu'èst-ç qui vos ratindoz po-z-è fé ostant ? C'èst po nos-ôtes èto qu'i cause insi !

**Bernard Van Vynckt**  
*Plaî-st-à Diè, mès djins !*

[www.ecoledewallon.be](http://www.ecoledewallon.be)